

摘藻堂四庫全書薈要

集部

欽定四庫全書薈要卷一萬六千七百二十六

集部

懷麓堂集卷九十七

明 李東陽 撰

文續稿七

集句錄

送徐學士先生之南京

迢遞山河擁兩京
儒門弭節下蓬瀛
文章宇宙千年事
江漢風流萬古情
才似茂陵非晚遇
帝于京兆最知名

欲知別後相思夢幾度朝回一字行

病起飲鳴治小樓奉謝二首

人向交游萬事慵
眼看春盡不相逢
爾家最近魁三象
我病猶堪醕一鍾
賓館有魚為客久
韶光隨酒著人濃
若為化作身千億
一月看花到幾峰

閉門空賦子虛成
第宅清閒且獨行
休怪兒童延俗客
不勞鍾鼓報新晴
定知何遜緣聯句
始覺僧繇浪得名
藥裏關心詩總廢
不妨還校有心情

鳴治集杜句見答因再集杜二首

柴門空閉鎖松筠錦里逢迺有主人老去詩篇渾漫興
晚來幽獨恐傷神自知白髮非春事何用浮名絆此身
戲假霜威促山簡病從深酌道吾真

夏日邀師召同飲
屢促始至殊有難

色

卧病江湖春復生空山獨夜旅魂驚欲知世掌絲綸美
肯信吾兼吏隱名佩劍衝星聊暫拔殘樽下馬復同傾
久為野客尋幽慣實少銀鞍傍險行

師召南樓別後頗以不得詩為憾因別贈杜句
一首

百年多病獨登臺
懷抱何時得好開
縱飲欲謀良夜醉
殊方又喜故人來
舊來好事今能否
恐失佳期後命催
傳語風光共流轉
須成一醉習池回

鳴治得詩再集杜并緝鄙句各一絕依例共得
八首

竹裏行厨洗玉盤
誰家數去酒盃寬
謝安不倦登臨費

乘興還來看藥欄

即事非今亦非古更覺良工心獨苦不薄今人愛古人
此道今人棄如土

不覺前賢畏後生才微歲晚尚虛名別裁偽體親風雅
轉見千秋萬古情

午時起坐自天明客至從嗔不出迎誰道朝來不作意
花枝照眼句還成

右集杜

睡起昏昏學病眠
眼看風景入新年
此心自信齊明久
星在明河月在天

四壁圖書畫舫如年光
如夢此驅除不才豈是官無事
敢謂明時獨負余

庭雪初乾不受塵
誰家池館愛逢新
相逢欲問江南信
夢入池塘都是春

兩日支持不出門
朝來消息喜猶真
無端世事論難盡
到得春來一樣新

右集句

玉川屢有一尊之約病起集杜句奉詔

錦纜牙檣起白鷗何時更得曲江遊
乘舟取醉非難事送客逢春可自由
念我能書數字至似君須向古人求
習池未覺風流盡許坐曾軒數散愁

同年會不赴集句奉諸年兄二首

射宮園棘斷經過三捷東堂摠漢科
拜舞盡隨仙仗入飛騰無奈故人何
山呼聖壽烟霞動雲擁蓬萊雨露多

二十年前同日喜幾時回首一高歌

并轄投多思不禁銀臺金闕靜沉沉共言東閣招賢地
空作西州擁鼻吟登第往年同座主抱琴何處覓知音
空懷遠道無持贈霄漢常懸捧日心

鼎儀同約止詩舉張汝弼吳元啟舊例以隻雞
斗酒為罰科數日後必有縛雞載酒而至者閱
月不見又不敢公言相督集唐句以諗之不敢
厚有所望得一和章足矣

多情長是惜年華
二月中旬已進瓜
漫說簡書催物促
莫將文譽作生涯
疎簷看織蛸蠨網
遠信聞封豷蕊花
閒說携琴魚載酒
馬蹄今去入誰家

東敷五侍講

曲江院裏題名處
遙想風流第一人
四海交遊更聚散
十年京洛共風塵
未央樹色春中見
茂苑鶯聲雨後新
試問登高能賦客
恩情誰是舊雷陳

自鳴治外屢有投贈而和章不至試語明仲即

躍然而起此非相負者集唐句以啟之

漢宮題樹憶仙郎共汝朝天會柏梁謝朓每篇堪諷詠
揚雄託諫在文章春浮玉藻寒波落水滴銅龍晝漏長
自有神仙鳴鳳曲不將清瑟理霓裳

明仲和章至謂不宜獨以險韻相困因索再和
一首

幾宿春山共陸郎飛飛輕蓋指河梁青雲舊路通仙掖
草色新年發建章身外虛名將底用愁來一日即為長

簷前春色應須惜昨夜新裁白翠裳

周侍講伯常聞予止詩作長句見督開戒因集
唐句奉答之

北闕晴雲捧禁闈洞門高閣藹餘輝郎中官貴施行馬
講殿談餘著賜衣載筆已齊周右史何人敢和謝玄暉
楊花榆莢無才思已分將身著地飛

送羅裡仲紹興教授

裡仲明仲之弟餘杭教諭之子也

輦下惟因憶弟兄何時開閣引諸生雲連海氣琴書潤

日射螭頭劍佩明好是五賢嘉賞地

府學教授一訓
藻四故稱五賢

早

知三禮甲科名餘杭溪上扁舟好猶是孤帆一日程

伯常因用前韻憶亡弟以予方抱此戚因以見

遣再疊前韻一首

紫界宮牆白板扉碧窓斜日藹春輝陽和本是烟霄曲
歌舞空裁雪夜衣畫省香爐違伏枕荒山野水帶斜暉
遙知兄弟登高處却望衡陽少鴈飛

和鼎儀漫興見寄韻

攜手城南歷舊遊
江南江北路悠悠
青山只憶招提境
白雪多隨漢水流
絳簡尚參黃紙按
清言遠待玉人酬
春風無限瀟湘意
宋玉無愁也自愁

春日答舜咨

竹窓幽戶有佳期
日暖風恬種藥時
自嘆馬卿常帶病
也知光祿最能詩
晨搖玉佩趨金殿
晚拂爐烟上赤墀
聞道仙郎歌白雪
萬家同唱郢中詞

亨父集句索藥奉和一首

多少分曹掌舊文不知何事久離羣
江淹彩筆空題恨荀令香爐可待熏
佳節屢從愁裏過寓書忽向病中聞
崆峒別有長生訣不惜千金借與君

清明送曰川敷五陪祀長景二陵

長安雪後見歸鴻暮節登臨且喜同
宮怨柳營烟漠漠馬嘶山店雨濛濛
漢家宮闕疑天上武帝旌旗在眼中
日暮長堤更回首自西流水盡朝東

雪不止再集一首懷二公山行之苦

海門寒日淡無輝雪入春分省見稀無酒誰供陶令醉

祀陵先齋戒

一日故云有情應濕謝莊衣殿前玉女移香案階下

奚官掃翠微寂寞江天雲霧裏行人獨向五陵歸

雨雪連日曰川敷五怪余詩有柳營山店之句

歸途幸晴富有倡和凡贈行者皆答獨不及余

再集一首奉謝并索和章

雨過風雷遶石壇清明依舊滿長安時人不識子心樂
且道無憂行路難小院迴廊春寂寂北湖南澗水漫漫

翰林風月三千首不得當時一字者

清明後二日與鳴治約訪王仁輔于大德館阻

雨寄鳴治

清明幾處有新烟獨向簷床看雨眠忽有好詩生眼底
暫留歡賞寄春前壺觴須就陶彭澤伴直難呼孟浩然
何用別尋方外去庾家樓在斗牛邊

送涇源趙判官致仕後歸自京師

紅亭綠酒送君還五柳先生本在山已喜皇威清海岱

又勞行役出秦關川原繚繞浮雲外樓閣參差紫氣間
聖代逍遙更何事睡烟歌月老潺湲

師召邀同鳴治小飲集句奉謝

青雲器業我全踈終日王門強曳裾尺組掛身何用說
閒情入骨若為除高人屢解陳蕃榻多病能忘太史書
明日珂聲出城去登山臨水復何如

聞陳考功朝用集古甚富詩以問之

信手同繙集古書自將佳句著州閭愁占著草終難決

欲報瑤瑤愧不如門掩落花春去後酒醒孤枕雁來初
人間富貴渾如夢消得揶揄勢利踈

惟我維揚先生以河南僉憲領南畿屯田事成
績上京師道得微疾乃卜居城陰慨然有終焉
之志惟時知先生者謂其卓特絕倫之才淵然
博古之學清白自守之操而使之循資待次于
銓曹之籍固非所宜先生當未衰之齒承當遷
之秩而遽自引退亦非士大夫之所望者其言

激切反覆而先生之意終未有以釋也東陽不才早以契家子受業門下恩義無與為比蓋于此有不能已者焉屬以幽憂抱疾杜門經歲屏去筆札不能輒有所述因集古句十律以代所欲言其始叙先生出處之概中述先生之志而終以鄙意自附于士大夫之論惟不鄙而終教之幸甚

二十餘年別帝京曾拋竹馬拜先生金章玉節鳴騶遠

潁水高山別眼明苦節難違天子命夢歸偏動故鄉情
平生志業傲唐舜直傍巢由寫一名

百官初謁未央宮十載長安似夢中歲發金錢供御府
口啣丹詔出關東魚能深入無憂釣鳥覆危巢豈待風
借問路傍名利客飛揚跋扈為誰雄

遙望旌旗汝水頭放歌曾作昔年遊誰能載酒開金盞
好為裁書謝白鷗路入塵中纔有累道非身外更何求
人間岐路知多少水遠山長步步愁

寂寞相如臥茂陵
閉門懶出病相仍
囊空不辨尋春馬
眼暗難看細字蠅
縱酒欲謀良夜醉
舊遊却憶向年曾
年年檢點人間事
祇有家貧免盜憎

黃道星辰北斗邊
却來平地作神仙
蓬萊豈隔三千里
時論同歸尺五天
未許謝公同隱逸
且隨蘇晉暫逃禪
悠然到此忘情處
目送歸鴻手絕絃

却筭遊程歲月遙
平蕪歸思綠迢迢
敢于世上明開眼
莫怪先生懶折腰
扶老未須蒼玉杖
還家初散紫宸朝

故人雖在多分散且可相從耐寂寥

玉帛朝回望帝鄉才名長帶粉闈香欲知潁水新居士
莫奏開元舊樂章舉世盡從愁裏老暮年初信夢中忙
如今不要教人識遙謝春風白面郎

擾擾車塵負薜蘿綠楊摧折舊官河清江碧石傷心麗
白水青山引興多去日兒童皆老大生涯心事已蹉跎
自慚久在諸生列奈此承明侍從何

白葛輕衣稱帽紗早將玄髮到京華離情不斷千尋縷

奉使虛隨八月槎鶴子見貧能代僕野人懷惠欲移家
知公不久歸鈞軸好趁春風入殿衙

滄洲漭沆帝城邊獨上江樓思渺然緩帶輕裘成昨夢
濁醪粗飴任吾年中原人物思王猛五絕才名數鄭虔
此際交親常引領春風雙佩好朝天

病中言懷長句

冬至至後日初長雪山冰谷晞太陽心搖目斷興難盡
身欲奮飛病在床自愛安閒忘寂寞紗帽接羅幃不着

醫師盡勸先停酒
朝客偶知先送藥
老去悲秋強自寬
不如高臥且加餐
亦知世上公卿貴
信有人間行路難
豈合此身居此地
可為一官妨快意
春來江上幾人還
夜半燈前十年事
去年來來去忙感
時撫事增惋傷
明年已身向天子
不待彈劾歸耕桑

又六首

歸思憑高黯
未消霏霏拂拂又迢迢
律回歲晚冰霜少
秋盡江南草木凋
新結茅廬招隱逸
便應黃髮老漁樵

年年檢點人間事未有涓埃答聖朝

謝朓裁詩月滿樓每因風景却生愁
愁占著草終難決欲採蘋花不自由
錦纜牙檣非昨夢楚雲湘水憶同遊
書生事業真堪笑語不驚人死不休

燒竹煎茶夜臥遲故山歸計入支頤
明時遇主誰甘退老病傍人豈得知
臘雪已添墻下水山風吹盡桂花枝
遊人過盡柴門掩獨立蒼茫自詠詩

五月扁舟過洞庭地分南北任浮萍
衣巾半染烟霞氣

雲水長和島嶼青故國山川皆夢寐昔年親友半凋零
思鄉懷古多傷別何處清風起獨醒

望美人兮天一方碧水浩浩雲茫茫病身最覺風霜早
離夢杳如闕塞長竹葉于人既無分梅花滿枝空斷腸
青袍白馬有何意萬事不如歸故鄉

午時起坐自天明又對青燈夢不成漫道人間無正色
莫教天下笑虛名酒酣懶舞誰相拽客至從嗔不出迎
猶有誇張少年處無端詩思忽然生

東劉東山司馬二首

日暮驚沙雪亂飛，將因臥病減朝衣。
身無彩鳳雙飛翼，家在寒塘獨掩扉。
白石淨敲蒸水火，苔痕常滿釣魚磯。
同年同病同心事，來歲如今歸未歸。

才名長帶粉闈香，身去東山間草堂。
苦節難違天子命，回軒應問石渠郎。
有時雲外聞天樂，剩欲樽前說故鄉。
聖代止戈資廟畧，一篇江漢美宣王。

歲暮長句

歲云暮矣多北風杲杲寒日生于東今宵敢嘆臥如弓
至齊不語坐高春疾病深藏稱懶慵軟炊香飯綠老翁
小槽酒滴珍珠紅華裾織翠青如葱故人相見來從容
人生何事不匆匆幾時奏事建章宮明時帝用補山龍
十年遭際嘆無功此時漫與蠹魚同不知造物哀龍鍾
故着昏花阿堵中可因霜雪愧青銅祇憑天地鑒孤忠
行藏在我有窮通長安雪後見歸鴻山色不如歸興濃
由來勲業屬英雄人間鷓鴣香難從瀟湘洞庭映虛空

故山還著白雲封
吾將此地巢雲松

歲暮即事二首

南雪不到地
芳華詎能久
北上太行山
雪片大如手
寒天十二月
古木餘衰柳
夜來風雨聲
此事古未有
感悟求其端
從卯將至酉
欲言無子和
夢我平生友
道路阻且長
故人今在否
少壯無幾時
親故傷老醜
百憂感其中
安得不皓首
遙遙沮溺心
汲汲魯中叟
區區諸老翁
悠悠百世後

我良更懶拙頽然臥前楹天寒霜雪繁挾纒如懷水平
生所嬌兒連翩戲中庭憂喜相紛擾倏如流電驚弱女
雖非男遠嫁難為情他鄉各異縣路險不得征寄書常
不達來鴈有餘聲萬族各有託歸鳥趨林鳴人生穹壤
間安得不合併無為牽所思我心始和平我欲竟此曲
庶幾知者聽

擬古將進酒

春風扇微和金樽綠酒生微波晴雲高鳥各自得遣我

寧不蒼顏酖百年三萬六千日向來哀樂何其多將進
酒世間萬事無不有君子有所思少逢舊親友小人亦
不閒終日馳車走病須書卷作良醫欲讀嗟如箝在口
我亦有丹君信否破除萬事無過酒杯行到君莫停手
君不見玉川子六碗通仙靈衆賓皆醉我獨醒我歌一
曲君試聽醉翁之意不在酒轉見千秋萬古情君不聞
濁醪有妙理君獨未知其趣耳古人今人若流水眼中
之人吾老矣

春日奉懷方石先生四首

一軒還向舊堂開
解組東歸亦快哉
兩度立朝今結局
百年多病獨登臺
山中習靜觀朝槿
石上題詩掃綠苔
安得與君討幽處
陶然共醉菊花杯

夕陽無限水東流
好為裁詩謝白鷗
處世當為天下士
似君須向古人求
故鄉今夜思千里
月色江聲共一樓
自笑百年家鳳闕
不知能似浙江否

菊花時節羨君回
喜過嚴陵舊釣臺
新句漸高塵累少

鄉音無改鬢毛催
東山芳意須同賞
王式當年本不來
應笑我曹身是夢
不衝風雨即塵埃

鶴拂烟霄老慣飛
令人長憶謝玄暉
古來賢傑知多少
舊日人民果是非
酒碗茶甌俱不厭
谷雲溪鳥尚相依
君今獨得居山樂
我已無家不念歸

壽潘南屏先生六十

乙丑正月七日

期君新歲奉恩光
人日題詩寄草堂
家住層城隣漢苑
馬隨仙仗識天香
絲綸閣下文章靜
安樂窩中日月長

人壽百年今六十朝朝染翰侍君王

袞袞諸公車馬塵世情誰是舊雷陳
貌先年老因憂國天為詩曹剩借春
不敢妄為些子事也能康濟自家身
世間甲子管不得明日從頭一遍新

芸閣為郎一命初論交已是十年餘
佳期笑把齋中酒

是日鴻寶誰收篋裏書潘岳序年因鬢髮
馮唐已老聽

郊齋吹噓惟應鮑叔偏憐我欲報瓊瑤愧不如

看取霜髯六十翁此心期與故人同
能安陋巷無如我

時予
在告 定把青藜獨照公復有樓臺啣暮景但將懷抱醉
春風長生不待爐中藥何處吹簫向碧空

高會當年喜得曹英名常得與時髦長嗟博士官猶屈
獨有揚雄賦最高已入玉堂同視草幾陪春色醉仙桃
滿頭白雪丹心在郎署何曾嘆二毛

新春雜興

從官千騎擁鑾輿遠上天階禮玉虛遙羨枚臯扈仙蹕
茂陵秋雨病相如

塞北天南萬里長江湖安得便相忘春風無限瀟湘意
却望并州是故鄉

仙家多駐玉華宮也有清愁白髮翁春色惱人眠不得
錯教人恨五更風

無才不敢累明時憶向天涯問紫芝多病所須惟藥物
病深何藥可能醫

掛冠殊不為高年祇是當時已惘然莫怪天涯棲不穩
在朝長詠卜居篇

同情雲路可翱翔
獨嘆青山別路長
自笑不如淮浦鴈
鴈飛猶得到衡陽

為園須接邵平瓜
小徑升堂舊路斜
自是不歸歸便得
春明門外即天涯

春愁黯黯獨成眠
病對椒花獨自憐
東道若逢相識問
恐驚憔悴入新年

浣花溪水水西頭
曾向慈恩寺裡遊
頭白故人無在者
夕陽依舊渚邊樓

平生雅志重丘山未報涓埃兩鬢斑清切會須歸有日
睡烟歌月老潺湲

身雖疾病尚吟詩三日無詩自怪衰戲集句成圖素壁
老身真覺似童兒


寄衍聖公

歸騎西風擁暮茄聖恩深念魯東家合歡却笑千年事
奉使虛隨八月槎心想事成夜間惟是夢眼知別後自添花
知君未愛東湖色水底魚龍漸可叉

松露先生夢懷翰林舊遊有詩見寄次韻奉以
答之

山店鐘殘夢到時
遙思獻納在丹墀
卷舒在我有成筭
藥餌扶吾隨所之
青草同心多逸興
白頭吟望苦低垂
丈人才力猶強健
搖落深知宋玉悲

懷麓堂集卷九十七



總校官庶吉士臣張能照
校對官助教臣金學詩
謄錄監生臣趙興吾

欽定四庫全書叢要

集部

懷麓堂集卷九十八

一百



詳校官候補通政司經歷臣郭祚熾

欽定四庫全書薈要卷一萬六千七百二十七

集部

懷麓堂集卷九十八

明 李東陽 撰

續稿八

哭子錄

哭兆先效體齋傅先生韻

少日生兒極苦辛
生時成幻死時真
光陰條爾過
雙眼形影子
然只一身秋
榜定誇攀桂
手暮歸愁對倚門親

哀歌不用存遺稿祇恐他年累故人

次韻答方石謝先生

生年在乙怕逢辛此語荒唐却近真
江海縱然能比恨乾坤空大不容身
文章自與箕裘別骨肉誰兼道義親
欲抱此情那向說先生原是虎傷人

再次體齋先生哭兆先韻

飛凰別後有新雛五色文章衆所無
八翼門高還自折九原聲斷不容呼
揮毫對客才空俊躡屐登山興已辜

檢點舊書三萬卷百年辛苦為誰圖

竹几藤床一病身向來魂夢已成真
浮名在世翻為累造物何心也
妬人買地南邦空習隱望雲東岳
苦思親不應又作吞聲別老泪無多不沾巾

因兆先病中韻答方石體齋二先生

兩月愁多白盡頭誰教骨肉轉成仇
哀歌激切長侵夜弱質凋零可待秋
覽勝獨迴東郡馬憶歸空買洞庭舟
不知死訣非生別猶悔當年誤遠遊

雪裏高山半白頭豈知山與雪為仇詩腸思苦難禁夜
病骨寒多不耐秋九陌風花空匹馬五湖烟月自扁舟
文章不藉雲霄力剛得江山助遠遊

圭峯董司空寄扇兆先欲焚之樞前以代掛劍
且侑以詩因感其義次韻奉答

空江落水夜紛紛遠道書來正憶君白髮有情憐顧况
青雲無路嘆劉蕡交期聚散三生隔世事盈虧兩字分
聞道藥籠無棄物願從殘稿拾遺文

一握清風萬里來故人遙在鳳凰臺多情欲共幽魂語
什襲猶煩老手開竹泪有斑和露滴燎烟無力被風迴
不知地下還知否地下如知亦可哀

和王古直哭兆先韻二首

漫道人琴一夜亡哀絃誰寫故人章才如卞玉元名楚
命比童烏不姓楊華表柱頭真浪語干將地下有遺光
畫圖指點趨庭事恨殺多情杜古狂

杜堇思別號古狂
嘗為兆先作頌卷

圖

極知世事如春夢不信人生有晝遊今日眼看埋玉樹
當年心許撞烟樓空勞掛劍來吳季翻悔歲書似鄴侯
多少西湖湖上水一時和淚共東流

次陳卿御史韻八首

夜臺聞哭聲哭遠聲漸邇誰知握手悲翻甚倒衣喜痛
定兩無言燈前黯相視我時餌湯藥僵臥方擁被憶別
亦須更神交豈疑似笑談勞記憶意態極摹擬共期魚
龍化未愛鸞和峙竭來經月病愁緒結不理慰藉有深

辭通家二三士哀歌感今昔高誼一生死死者恐弗聞
生者猶在此忘情固非義情劇乃為累有淚欲成河東
流浩無涘

其二

向時科舉業有戒在歌詩寧圖目前捷秘彼胸中竒遺
文不多得往事何能追幸當英俊場猶得親驅馳雖非
盡精力庶以輸情私今我忽觸目讀之但嗟咨一讀廢
宵眠再讀忘晨炊三讀輟掩卷起立向堦墀平生趨庭

事所得僅如斯他日蓼莪篇誰當歌父兮

其三

振衣思崇岡濯纓受清沚渠生不出戶有興諒非邇如
聞解吾意直欲遠城市歸與志不遂輾轉勞夢寐買田
復卜居此計方未已渠在我不歸渠亡我安恃為官累
妻孥世路紛皆是渠雖未知道臭味頗予似登高忽不
見望遠如有俟猶恨獨歸遲青山負雙履

其四

文章若山斗跬步勞攀躋道德若漁獵終焉費筌蹄長
塗不易至志士恨每齎吾子獨何為超然出羣迷如居
百物市貴不數象犀如觀大海津怪不駭鯨鯢傷哉不
復見永矣含悲悽

其五

交情若市易世路如棋枰空歌伐木篇幽谷無丁丁吾
兒託英俊意氣千鈞輕心當斷金石興豈耽孟觥父行
友鄭莊長者過陳平文成衆所賞名在汝不爭賢哉西

臺彥重此骨肉情譬如喬松枝下有葛藟縈脉脉青雲
外誰當和友聲

其六

幽人甘固窮達者不諱死物理多偏頗吾生有涯溪喪
明亦真情顧為達者嘗誰哉能不憂矯枉非具美俯仰
天地間何獨無父子角驂與豚犬徃徃不相似吾才豈
足多吾家合遺祉未論骨肉親嗟嗟失佳士

其七

蒙翁喪四子豈復為人父盛年氣飛揚永路身齟齬於
我得外孫代為詩書主終焉亦凋謝我與翁為伍人言
孫似翁文字足繩武鬱如千尋柏嘉種出新甫未登廊
廟用先罹斧斤苦痛爾不翁如我心酸欲剖

其八

傍架檢我書就床理我琴書殘有遺香琴斷無餘音傷
哉歲月邁默坐整我衿萬事勿復道繁憂劇難任塵帙
污我目哀緒傷人心心目兩無用不如盲與喑

次顏士廉編修韻六首

青陽忽改歲白日慘不光生死復幾時幽明渺相望哭
聲徹九地矯顧遍八荒閉門讀哀誄卷帙動盈箱勞君
贈遜情念之徒傍徨

其二

閒雲不作雨死水無生萍嗟嗟薄命人未壯目已瞑榮
華能幾何奄忽成凋零至意渠獨領鳴哀我親聆耿如
黃城燈初心尚晶熒念之不能忘水天終吾齡

其三

念彼平生交切磋多箴言如君合師友相視猶弟昆居
然入室久艾蕭化蘭蓀植弱以為強磨光發其昏一朝
遽淪落此意將誰論

其四

文章各異尚得失動相齟學古者猶然豈獨論藝舉當
其得意時感激中自許自渠淪沒後慵復事毫楮擲筆
罷哀吟空堂正風雨

其五

塞翁既馬失滅穀俱羊亡有子不及成無者同惋傷死
生亦大事父子乃天綱誰將蓼荼苦置我甘脆腸魂氣
無不之遺體先歸藏他日治田時歸來但茫茫

其六

短衣立長松我夢忽見之平生舊思愛宛爾不復疑形
骸獨委棄魂魄相因依勸君勿說夢使我聽欲癡夢者
有覺時死者無還期死生亦夢覺高論何崔魏因君復

深悟千秋竟同歸

次韻答海釣二首

秋風一夜起關城
哀調驚傳耳為傾
四海交游誰骨肉
兩家父子盡平生
來鴻去鴈年年事
白日青燈字字情
猶記綵衣趨侍日
幾回當客誤呼名

少日才華滿帝城
衣冠四座一時傾
去來今事總成夢
一十七年空此生
老有箕裘誰繼業
病中骨肉轉傷情
不知精力緣愁減
猶向深山問藥名

李白洲侍郎屠元勳都憲有詩弔兆先次韻奉

答

空懷樽酒試論文今日高軒又過君
燕市價高誰更問
楚招聲斷不堪聞
構成舊屋驚風雨
種得新松恨斧斤
自古人才何敢預
祇將科第惜劉蕡

次錢汝謙修撰韻

兆先嘗從
學汝謙

有口莫問天天道長悠悠有石莫填海
海水何時收
閉門掩青鏡無言搔
白頭靜觀得物理
定勝非人謀
書香

既有亭懷麓亦有樓平生堂構心付此土一坏憶當童
非歲經史實研求方期成豹變竟抱龍蛇羞往事勿復
陳茲生遽長休空來束芻帛永負擔簦遊

次韻答邵國賢提學五首

話別存亡異論交父子真書來剛慙我讀罷轉愁人世事
經雙眼宗祊在一身他年重握手相對各沾巾

其二

累月君聞訃經年我得書傳疑終作信凝望總成虛歲

月呻吟裏江山涕淚餘
閉門無弔客愁坐廢冠裾

其三

節改成新歲吾良更老親
遠書煩故舊哀調起比隣
駐馬瞻雲日聽鷄問寢晨
此情拋未却時復上心頻

其四

擬學全家隱常為出世談
壯心猶夙昔歸計失東南
詎重思隣卜情多勝館驂
江湖空滿地無處着茅菴

其五

遂有他年卜真成觸事悲
歲書餘舊篋封竹剝空枝白
髮三千縷愁心十二時
悲歌聊當哭何意復吟詩

次何貞外子元韻二首

舊業銷沉筆硯中
半生何但坐詩窮
假山石減峯全瘦
落葉聲稀樹已空
豈謂形神非夢幻
浪誇頭角自兒童
淵明賈子君休笑
我已無心效此翁

東野詩從死後昌
祇今誰在復誰亡
人間夢筆非無兆
地下修文信有郎
牛斗筭時衝劍氣
簡編何日繼書香

閉門只合蕭然坐十日愁多雨正滂

又一首

回首黃梁是夢中直從斑白記兒童
兒童過盡還斑白
獨立蕭蕭樹底風

次王主事叔武韻五首

回風捲飛花愁緒紛欲起白雪無餘聲
青雲有遺止
客來強啣杯客去空覆盞春寒衣袂薄
夜久燈焰死
從師思問道歸妹期在此意氣夙徒勤
終焉竟安恃承歡

與服養瑣瑣焉足記徃者已復非來者寧可俟

隙地苦無多書齋不盈丈向非通家客誰與散幽况憐
渠隔光景老我稀半行愁看假山雪宛在危峯上憶觀
聯句時此興何由忘誰將悶懷鬱轉使悲歌放兀坐比
書空咄咄成悲愴

輟君思友篇聽我哭子詩君情固未已我恨猶多遺皇
天不祚善降禍良亦竒省躬或自致暗室空獨知三遷
不出都生長竟于斯斯干有嘉詠遂作終身悲

都來一寸心中有九回腸腸中何所有萬恨復千傷迨
歲若偏仄逢春亦徬徨漢儒有遺女僅可補書亾尹侯
有令子空使履晨霜古今本殊科事變亦靡常渠生詎
非壽已勝同兒殤

多君義斷金顧我心匪石每聆慰籍詞日夕無厭射苦
調少懽悰明珠疑暗擲秋憐丹桂凋閔憶黃楊色磨礪
漸光彩長養空羽翮平生愉婉容儼若親几席竭來蹉
跎計尚未成窀穸所嗟身淪沒安用名輝籍

次石檢討邦彥韻三首

中歲意不適衰病相侵陵還思後生人命薄如春冰閒
居讀古賦援筆寫大鵬趨庭比授簡巾襲累數層因懷
江海興勇欲辭眾冒茲謀竟落寞斷墨空殘藤開緘見
渠名益使痛恨增擁爐夜不寐坐待朝陽升

其二

荒郊有蔓草大道無幽蘭蹄跡有停潦長江無回湍渠
生亦得地都市非林巒半生長養心付此指一彈痛定

忽復痛仰天但長嘆每逢故舊人宛作骨肉者感物泣
楚玉傷時詠齊紈悲哉勿重道老淚空成瀾

其三

庭梧葉盡脫慘澹落日黃鳳雛忽飛去哀調鳴孤凰左
盤右辟抑復揚宛若戲絲在我傍視之不見轉茫昧燭
影坐照如人長愁多夜深不得睡強起傍戶立欲僵蠶
蛸掛壁塵滿牀牀頭古劍無精光開緘檢書書在麓哭
聲應山山為瀑噫氣長噓衡岳雲淚痕徧灑湘江竹東

南地缺天西傾人生安得長豪英古今成敗類如此我獨
痛恨何時平由來生死同朝夕轉眼歡娛成悼惜方將
一髮繫千鈞空教二子埋雙壁每嗟杜牧難開口欲種
淵明五株柳斷送年光豈在多依棲世路那能久暫時
自遣還自哀冷風似覺魂歸來誰當為築歸來臺無人
解和白雲調有士不酬黃金盃石郎石郎惟子可語此
君看宿草生蒼苔

懷麓堂集卷九十八

欽定四庫全書蒼要卷一萬六千七百二十八

集部

懷麓堂集卷九十九

明 李東陽 撰

文續稿九

求退錄序

弘治乙卯春東陽辱先皇帝簡入內閣參預機務自
揣涼薄弗克膺重任具疏辭不許黽勉就職辛酉春
屬以疾告三具疏乞休繼以災異辭以不職辭前後

十餘上皆不許自受顧命以來恭遇今上皇帝嗣大
歷服自度無所補益當正德丙寅秋與少師洛陽劉
公少傅餘姚謝公並辭亦不許疏再上二公皆得請
以去而東陽獨被留命旋值權姦竊柄國是動搖既
不獲退則曲為匡掇十不能一二累疾累辭及會典
實錄次第告成藩賊外平逆臣內殄上遵宸斷下釐
弊政稍稍就緒而諸方盜起累歲而後定中間疾
時作輒不得已而辭辭必奉溫旨俯加慰勉且命醫

調治遣內臣存問甚者勅吏部敦諭趣令視事恩禮
隆特出於常格揆之輔導之責顧托之義避勞就逸
竊有未安獨病與年增智隨力竭聞之古人不能者
止每一思之泚汗交集故雖冒威瀆聽有所不避或
浹月再陳或期歲十上誠悃之積上通於天乃於壬
申之冬歲未盡四日特賜俞音許令致仕恩典之厚
復加於前慙負之極竟莫知所以為報也居閒無事
檢閱舊草仰念兩朝眷注之德一代之典禮存焉不

敢以蕪陋自棄彙錄之得若干篇為三卷總名曰求
退錄而辭廕之章謝恩之奏亦以事附焉正德癸酉
春正月二十四日特進光祿大夫左柱國少師兼太
子太師吏部尚書華蓋殿大學士致仕李東陽謹序

奏

奏為辭免重任事近因內閣缺官該吏部奉旨會各部
都察院通政司大理寺并科道官推舉堪任六員而臣
名濫與其列欽此臣聞命震驚罔知攸措臣惟內閣之

設所以輔君德播王言參預政機敷陳治道其任至重
陛下稽古右文選才授任採諸輿論斷自宸衷其選至
嚴如臣者性資愚劣問學空疎忝居儒林叨侍經幄三
十餘年畧無寸補去年仰蒙聖恩陞授今職令在內閣
專管誥勅臣時輒欲具本辭避但念誥勅一事或可勉
強効勞因循至今又辱新命矣受恩愈厚則報愈難受
任愈重則力愈困若不量力而止知難而退必至曠官
誤事速戾招尤而欲上副聖天子之知下答卿大夫之

望決不可得伏願聖慈收回成命令臣照舊供職則容
貸之恩過於委任萬萬矣弘治八年二月初十日奉聖
旨卿學行素著特茲簡任不允吏部知道欽此

奏為陳情乞恩懇祈休致事臣近因感患眩暈等疾不
痊具本陳情再乞休致奉聖旨卿才德素著精力未衰
有疾宜用心調理以副委任豈可固求退休所請不允
欽此仰惟溫詔之褒諭聖情之眷注至深至厚臣才微
德薄精力實衰內自揣度益增感愧其何以上副聖恩

於萬一乎自是夙夜祇懼用心調理又復許時伏念臣
以一介寒微誤塵侍從過蒙陛下簡擢至此凡職所當
為力所能盡雖隕身碎首亦不敢辭而病勢纏綿將輟
復作即欲勉就驅策誠有未堪且臣之疾其始亦甚微
也醫家謂之內傷內傷之證似輕實重而臣忽之自謂
無事或飲食過度或勞佚不時積日累歲其來已久以
致元氣弊虧痰邪膠結表裏俱虛標本皆病故用藥愈
難而取效亦不易若復強勉匍匐進而不止敬什顛踣

之患難保必無此臣所親試而非過計也故呻吟鬱悒之中思念時事於古人以身喻國之義竊有感焉方今世久承平積安成玩災異迭應邊冠縱橫財匱民窮兵疲將寡天下之事大有可憂宵旰之間屢屢聖慮正人臣竭志極力分憂共患之日况股肱心膂之地安敢憚難擇便私為身圖但臣以病質庸才冒居重地雖在平時尚無裨補當此多事豈能仰贊大猷徒擁虛員復妨賢路臣之愚實不知所以自處也伏望聖明檢臣前項

二次所奏情詞許臣致仕別簡賢能代補臣職則臣曠官誤事之咎亦少逭矣然臣受恩既深無以為報輒敢復有所陳尤願陛下敬畏天戒矜恤民窮勤勵講學省節遊宴愛惜財用慎重官爵禮制貴戚法馭邊將親賢遠佞崇正闢邪達臺諫為四聰合官府為一體遵憲章於列聖嚴教養於皇儲以培天下之元氣以壽國家之命脉此臣區區犬馬之誠有不能自己者倘臣言可采陛下幸留意焉則臣之退猶臣之進也如其不可則臣

雖力疾備位苟充任使陛下將焉取之而亦將安用之
哉臣不勝懇悃激切祈恩俟命之至弘治十四年五月
初六日奉聖旨卿引疾乞休已屢有旨不允宜勉起供
職以副委任毋再固辭吏部知道欽此

奏為辭免加陞事弘治十六年二月二十八日節該欽
奉手勅吏部尚書華蓋殿大學士太子少保禮部尚書
兼文淵閣大學士李東陽陞太子太保欽此臣等聞命
驚惶罔知攸措竊惟師保之官所以論道弘化格心輔

德實百僚之表率為天下所具瞻其在朝廷之與儲宮
雖各有攸職其義一也臣等自蒙陛下簡置內閣以來
累荷聖恩加授今職並參機務兼輔儲闡任重地親官
高祿厚而材力絀薄識慮空疎不能翊贊鴻猷養成睿
學歲年徒積績效靡彰每自循省輒增愧畏比者恭遇
陛下稽古右文任賢圖治考先朝列聖之制修大明會
典之書而臣等叨奉德音總裁其事勉加裒輯幸克成
編乃職業所當為豈勲庸之足論况上而仰仗聖聰俯

垂宸斷下而羣僚分職衆力均勞臣等何功首蒙甄錄
或兼拜兩師之秩或起登一品之階部署迭遷殿名遞
進官資賈絕寵數彌隆越分踰涯於斯為甚慙懼之極
益無所容伏望聖明收回成命俾臣等俱以舊官供職
圖報將來臣等不勝感戴天恩之至弘治十六年三月
初四日奉聖旨卿等輔導有年勞勲著稱特加陞職所
辭不允吏部知道欽此

奏為自劾失職辭避重任事臣等俱以愚庸遭遇先帝

簡任內閣委以腹心臨終顧命惓惓以陛下為託臣等
痛心刻骨誓以死報及當初政竭力匡持未敢輕易求
退近者地動天鳴五星凌犯星斗晝見白虹貫日羣災
疊異併在一時京城道路白日殺人西北諸邊敵騎猖
獗損軍折將前後相仍戰則無兵守則無食民生窮苦
府庫空虛風俗傾頹紀綱廢弛賞不當功罰不當罪法
令不行名器冗濫諸司弊政日益月增百孔千瘡隨補
隨漏當此之際內外臣僚協心倍力猶恐弗堪方且持

祿固寵任情作弊讒謗公行姦邪得計變亂黑白顛倒
是非人怨於下而不知天變於上而不畏竊嘗歷觀載
籍徧閱古今未有如此而不亂者也恭惟即位之初詔
書一下天下延頸相望太平而朝令夕改訖無寧日百
官庶府倣倣成風非惟廢格不行抑且變易殆盡建言
者以為多言幹事者以為生事累章執奏則謂之再擾
查革舊弊則謂之紛更憂在於民生國計則若罔聞知
事涉於近幸貴戚則牢不可破以一二人之私恩壞百

年之定制而不顧以一二人之邪說違滿朝之公論而不恤臣等叨居重地徒擁虛銜或旨從中出畧不預聞或有所議擬徑行改易似此之類不能一一備舉臣等心知不可義所當言累有論列多不見允此為兵戶等部議處鹽法功次等事具本上陳極言利害拱俟數日未蒙批答若以臣等言是則宜俯賜施行臣等言非則亦明加斥責而乃留中不報視之若無使臣等趣向不明進退無據深憂極慮寢食弗寧亦知內告外順人臣

之常但政出多門各歸臣等捫心反顧無以自明展轉
於衆事非獲已嘗聞宋儒朱熹有曰一日立乎其位
則一日業乎其官一日不得乎其官則一日不敢立乎
其位今勢窮理極已至于斯若諉顧命之名而不盡輔
導之實因循玩愒竊祿苟容既負先帝又負陛下不但
取譏當世亦將貽誚方來用是共瀝愚誠上塵天聽伏
乞聖明矜察特允退休別選賢能代茲重任少追分毫
之罪幸延犬馬之年則陛下優待舊臣之心勵精新政

之義兩盡而無遺矣臣等不勝懇迫激切之至正德元
年二月十五日奉聖旨卿等切切為治的心朕已知之
所言事待斟酌行著用心照舊輔導該衙門知道欽此
奏為自劾失職懇辭重任事臣等具奏自劾奉聖旨卿
等切切為治的心朕已知之所言事待斟酌行著用心
照舊輔導欽此臣等聞命驚惕愈不自安竊聞委質事
君者人臣之常職託孤寄命者天下之重任必處常而
不失其身任重而不負其託然後可以無愧若徒曠官

尸位而假委質之名不能扶顛持危而冒託孤之寄斷乎其不可也痛惟孝宗皇帝大漸之時台臣等至乾清宮御榻前而賜顧命諄諄數百言臣等頓首拜受不勝嗚咽彼時司禮監大監陳寬等實共聞之伏自陛下嗣位之初臣等輔導啟沃多見施行少伸報稱近數月來往往旨從中出畧不預聞有所議擬徑行改易詔書不信政令失中臣等叨冒寵榮憂慚無地今不敢縷數姑以其重者言之商人譚景清等附託皇親奏討殘鹽既

不肯奉詔還官又不肯領回原價挾制朝廷搖撼官府
沮陛下之美政累母后之盛德論其情罪死有餘辜且
皇親之家既已辭退家人引咎此商人者已不相干而
乃曲為庇護寧使帑藏空虛邊餉匱乏而不之顧此政
令之失一也大同隨征所開衝鋒破敵三次當先二項
揆之舊制俱不該陞况紀功官原開按伏不係對陣侍
郎等官勘得功無顯跡查無明證名字不對多寡不一
而乃查近年弊政欲陞數百冗員以官法為人情視爵

祿如糞土此政令之失二也內府冗員奉旨裁節僉書

守門及分守守備等官減革者百無一二而南海子淨

身人又選入千餘非惟傷財害民抑且敗壞風俗至於

蟒龍玉帶濫賞無算大壞名器尤不可言此政令之失

三也御用監書篆缺人吏部奉旨考選乃令革退人役

通送本監考校優劣是不信銓衡之任而信寵幸之臣

況該部查出革退之人俱係黃緣傳奉奉詔裁革纔不

幾時遽開此例則匠官術士做做成官以邪路為當行

視詔書為故紙此政令之失四也他如皇庄田土已令
巡撫官查數又復差官踏勘取者未回差者繼出帶領
人役騷擾地方勢所必有京畿小民貧困已極何以堪
之此政令之失五也駕帖出外拏人累經各衙門論奏
恐生詐偽近因皇親家人奏懇畿民侵占田土祇憑一
面之詞輒為出給提解來京鎮撫司打問情節俱與原
奏不同未免仍解本處官司問理牽連負累破家蕩產
冤苦之聲致傷和氣此政令之失六也韋興齊玄蠱惑

先朝盜空府庫罪大惡極一則夤緣分守累劾不退一則奏請追究止令取回遷延至今未正刑典此政令之失七也各營執事官軍及內府軍匠各倉庫斗俱經奏准查赴團營及各衙門乞留仍復照舊廢營伍之籍供私門之用此政令之失八也內承運庫銀兩支銷累數百萬內府支用不給印票該庫內官自請查算竟爾不行司鑰庫銅錢該部累奏支用展轉推延至今未發此政令之失九也饒州磁器奉詔蠲免二年又令起運來

用此政令之失十也似此之類未易悉舉臣等或傳聞
坐視無可奈何或封還執奏不能終止其為失職實所
難辭追思先帝臨終顧命之言仰念陛下委任舊人之
意若涓埃之力少有所裨犬馬有知猶當報德況主少
國疑四方多事豈忍潔身去位自求便安但忠不足以
格君才不足以濟世智窮力竭日甚於前向者臣等所
陳奉有聖諭朕便處治至今事有未行所奉聖諭云待
斟酌行是必言無可採乃使之照舊輔導亦不過仍前

失職而已先帝赫赫之靈臨之在上豈欲其冒輔導之

虛名而蹈曠廢之實咎如此哉臣等再四籌度夙夜靡

寧陳力就列不能者止聞之古人亦有明訓與其身自

壞之不若讓之能者用是備瀝愚忠再申前請伏望聖

明俯垂洞察諒臣等為國之心非由矯飾正臣等失職

之罪特賜罷歸亟選非常之才俾任難為之事庶可以

上回天變下慰民心承先帝付託之隆保祖宗基業之

重矣臣等干冒天威不勝懇迫激切之至正德元年三

月初二日奉聖旨所言事件著各衙門查奏定奪卿等
盡心職務以副倚任該衙門知道欽此

奏為陳情懇乞休致事近該臣具本陳情奏乞休致奉
聖旨卿輔導有年勞勩顯著受先帝顧命託倚匡弼以
隆政治上天垂戒朕自警省卿安心辦事勉副委任毋
再固辭欽此臣聞命驚慚措身無地竊伏自念臣以弱
質病軀冒膺寵祿蓋自入閣以來未久即病間歲屢作
作必踰時累月且如頭眩一節曾兩次暈倒在閣攙扶

得出衆目所見臣不敢欺加以舊患寒濕後增痔漏藥
餌之服與食相半秋末冬初百疾齊發扶羸振憊已弗
能堪又以庸才陋識素乏寸長尸曠之愆與歲俱積今
年臣與劉健謝遷各具本乞休臣於本內明開三人之
中臣最當退過蒙優旨並賜勉留昨者懇乞退休事同
一體健遷皆荷聖恩獲蒙俞允而臣獨被存留校臣之
病比之二人尤多揆臣之才比之二人獨劣若依栖眷
戀苟幸安全正恐累陛下知人之明孤先帝顧命之重

非惟智窮力盡不能復有裨益抑且沉溺顛覆無以自容展轉激迫實不知所以為處伏望聖慈慰臣衰病收回成命仍許退休使臣得與二人同賴旣幪並生天地縱莫效銜環之報猶當為結草之圖臣無任懇悃激切祈恩俟命之至正德元年十月十五日奉聖旨具陳休致臣下職也黜陟人材朝廷公論卿有疾密訪明醫揀選良劑善加調理勉副重託倚毗政務切毋再辭吏部知道欽此

奏為自陳休致事臣繇力薄才孱軀病質遭逢列聖竊
祿明時歷仕途者四十七年居秘閣者一十六載思危
負重恒懼弗勝蓋自弘治辛酉之後數乞退休至於正
德丙寅以來累陳衰疾並蒙慰諭弗賜允俞追念先皇
帝委任顧託之重仰荷聖天子優禮眷遇之隆自度尚
可支持豈敢過為矯亢因循覩報幾閱星霜乃今春不
雨風霾累月四川湖廣等處盜賊成羣水旱之奏殆無
虛日聖心驚惕俯念元元特命廷臣致齊九日祇告天

地神祇用祈雨澤臣於此時內自省疚竊據古人策免之義即欲引咎自陳不意寧夏逆賊上厓西顧之懷下詔頒恩命師討罪主憂臣辱死亦何辭夙夜在公寢食俱廢扶衰力疾又越兩旬近者守臣奏捷賊黨就擒邊境獲安民生漸遂顧疾疚生於喜樂筋力痿於安閒四體俱疲百病交作雖欲勉輸分寸力不足以濟時縱令強效驅馳志不能以帥氣質之以盈虧之道揆之於進退之宜及此是圖猶為未晚伏望陛下高明照察廣大

包容赦其瘼曠之愆憫其懇激之請許令休致以遂初

心俾枯朽之木獲全樗櫟之材駕鈍之資得延犬馬之
齒豈但終身而知感尚當沒世以無忘臣無任祈恩俟
命之至正德五年六月初一日奉聖旨卿累朝重臣已
受先帝遺命輔導朕躬才德兼隆中外悉知譽望顯著
海內咸聞尚未從心之年神彩精健正當輔任凡事用
心足見為國至意近因寧夏叛賊勦平皆卿叅贊之力
朕心允協安忍懇切引疾求聞有疾宜親近藥餌善加

調護累有旨勉留安心辦事毋負遺命朕意所辭不允
吏部知道欽此

奏為陳情乞恩休致事近者臣以衰疾自陳求退伏蒙
恩旨曲賜褒嘉責之以顧命之專委之以輔導之重周
詳備悉百有餘言臣聞命驚惶莫知所措上思先帝則
涕泗橫流仰念聖躬則憂慚並集實不知何以為報也
但人臣之義能則致身不能則止二者之間不容以髮
臣八月而生元氣素弱今年六十有四卦數已周體不

勝衣食不滿器朝叅之日嘗值大風幾至顛仆衆所共見加以志慮日短學術愈荒事多遺忘字每差錯臣之少也猶不如人今既老矣何能為役用是具疏乞休已非一次比見朝廷多事黽勉供職如會典未完則不敢言退實錄未進則不敢言退需澤未降逆賊未擒則不敢言退今纂修粗畢僭亂已平指授出於宸衷制馭由於廟筭臣奉行宣播幸托有成况威嚴之後漸復寬仁中外臣民欣欣望治伏惟陛下明識遠慮持久而行之

何所不至臣之庸弱豈復能裨益於萬一乎若以有限
之力供無益之役隳政債事而不知止則其罪益大矣
故敢不避煩瀆再申前請伏望陛下垂天地生成之仁
推家人父子之愛特降俞音許令休退使殘喘微軀幸
而未盡則一日之存即陛下一日之賜也臣無任懇切
俟命之至正德五年六月初三日奉聖旨卿引衰疾疊
請休致至再至三厯旨勉留宜盡心職務允協朕懷不必
固辭有疾多訪賢醫善加調理吏部知道欽此

懷麓堂集卷九十九

欽定四庫全書薈要卷一萬六千七百二十九

集部

懷麓堂集卷一百

明 李東陽 撰

文續稿十

求退錄

奏

奏為陳情乞恩懇祈休致事臣年六十四歲入仕途者四十七年在內閣者十六年越自先朝至於今日具本

辭免者二十餘次誤蒙先皇帝及陛下厚恩簡命委託
勉留曲諭至詳至切用是扶衰力疾強効驅馳顧以駑
劣之才絲薄之力誠不足以動物術不足以掾時比者
司理監大監劉瑾專權亂政貽害軍民仰承陛下洞照
姦謀奮施乾斷明正其罪以慰人心中外臣民萬口稱
快臣竊念備員禁近事體相關凡票本擬旨撰寫勅書
或駁下再三或徑自改竄或帶回私宅假手他人或遞
出謄黃逼令落底真偽混淆無從辨白臣等雖委曲匡

持期於少濟而因循隱忍所損亦多荷蒙淵衷明見謂
不與內閣相干然玉毀積中亦難辭責理宜罷黜更復
何言伏望陛下高明鑒察特降俞音放歸田里遂臣初
志別求賢俊俾贊機衡則臣雖未盡犬馬之勞亦免積
丘山之咎矣臣無任懇悃激切之至正德五年八月十
六日奉聖旨卿以宏才碩德佐政先朝嘉謀嘉猷播在
天下先帝顧命輔導朕躬劉瑾專權已正其罪今覽卿
奏知劉瑾將崇本擬旨再三駁下徑自改竄或帶回私

宅假手他人又遞出騰黃逼令落底百端蒙蔽卿委曲
匡持朕已悉知宜安心辦事不允所辭凡劉瑾所行亂
政著各衙門逐一查改該部知道欽此

奏為辭免恩命事正德五年九月二十日節該欽奉手
勅寧夏叛逆事情內閣輔導重臣運籌合議大功既成
宜加恩典少師兼太子太師吏部尚書華蓋殿大學士
李東陽加特進左柱國廕他男一人做尚寶司司丞賞
銀一百兩紵絲四表裏欽此臣聞命之餘震驚無地竊

惟論功行賞固朝廷之盛典竭忠盡職實臣子所當然
顧恩恒易於滿盈而職每難於稱塞臣備員內閣久切
曠瘵累乞退休未蒙俞允官資祿級已極人臣自揣庸
愚畧無寸補近者西藩弗靖上軫淵衷自命將出兵以
至班師獻馘地方平定民物底寧皆由陛下聖武神謀
運用於上內外重臣各邊將士効力於下臣等奉行宣
布不過言語文字之間何功何勞而濫受官賞如臣者
求退反進辭少就多省已捫心倍增悚愧至於廢子之

制尤為慎重臣老而無子止有繼子李兆蕃年方二十
先已蒙恩入監自有出身若復冒殊恩驟陞華秩尤恐
年輕力弱弗任驅馳非徒貽名器之羞抑且招士林之
訕臣之罪咎日以彌深凡此數端無一可者伏望陛下
俯察愚誠非為虛讓並收嚴命以待有功臣感荷曲成
勉圖後報叨冒之愆庶可少逭於萬一矣臣不勝云云
正德五年九月二十三日奉聖旨卿以名德重望輔導
累朝忠勤勞勩功業茂著近者寧夏叛逆運籌合議致

有成功官廕賞賚禮不為過不允所辭該衙門知道欽
此

奏為陳情乞恩再求休致等事臣於本月十八日奏乞
休致仰塵德音曲加慰諭未賜俞允臣拊心內省實不
自安竊惟人臣事君固當竭死生之力尤當謹進退之
節臣見今六十四歲歷事列聖四十七年參預機務一
十六年才踈力薄當退一也多病早衰當退二也久玷
班行多竊俸祿當退三也但顧命之重責任方殷大義

所關亦非得已蓋聖質方壯庶事未定則不敢言退藩
臣倡亂邊境未寧則不敢言退大姦未除弊政未革則
不敢言退用是懷憂抱愧含垢納汙雖因事累辭終不
獲果於自遂幸遇陛下聰明日進政令一新天下之人
延頸望治太平之幾正在今日臣若貪位戀祿玩歲愒
時及此不圖更復何待聞南京監察御史張芹奏臣當
劉瑾專權亂政之時不能力爭及陛下任用得人潛消
禍變却又攘以為功冒膺恩廕緣寧夏事平伏承陛下

遣司禮監官傳示聖意欲加恩典臣極力苦辭幾至垂
涕及手勅既下加臣特進左柱國廕臣男為尚寶司丞
臣隨即具本懇辭竟不獲命黽勉拜受本非素心但寵
祿之頒過踰涯分傳聞遠外實駭羣情其言禮貌之屈
否衆所見聞攘功之有無已蒙聖鑒若不能早退又不
力辭此二端者切中臣病况臣揣已量力見可知難盛
滿之懼已非一日安敢以衰老之身蒙叨冒之罪上以
玷陛下知人之明下以貽士林未備之議哉伏望聖慈

察臣愚悃許臣致仕將臣男兆蕃收回成命令其照舊以監生聽選出身徐圖補報則優禮舊臣之恩曲成萬物之德臣舉家父子咸知感佩於無窮矣臣無任悚息激切之至正德五年十一月二十四日奉聖旨覽卿奏具悉至情卿輔政有年精忠純謹中外共知屢次引疾求退先帝及朕為天下事重曲加慰留近來大姦既去朝廷圖新治理委任方隆豈可偶因人言固求休退吏部便往諭朕意大臣義當體國宜勉起供職不必再辭

賞功推廢係是舊典李兆蕃已錄用了也不准辭該衙門知道欽此

奏為老病乞恩休致事臣於去年十一月內三次具本乞休累辱溫旨勉留諄至臣感恩懷愧無以自容猶欲上訴懇誠適遇陛下恭上兩宮徽號禮殷事重竊念受恩累朝職在述作因循強勉又閱歲年續以朝覲科舉政務頻仍命將出兵事體關涉訖無寧處豈暇言私但衰老益深疾病交作五月以來鼻衄脾瀉痔漏下血或

委頓一時或纏綿累日積成虛耗愈不能支開註門籍
在家調治閉戶退思捫心內省問其官則三孤之官也
問其祿則一品之祿也問其職則論思輔導百職之所
萃也今神思荒落不能效謀慮之勤精誠未孚無以為
感格之地無其實而虛冒其名受其職而不稱其事乃
龍鍾于踰六望七之歲而不知止栖遲于十有七年之
久而不知退未嘗不汗流浹背而食不下咽也自今以
往臣若留一日則增一日之愆當一事則多一事之咎

寧不為貪冒之魁以貽聖明之玷哉用是備瀝愚衷再
申前請伏望聖慈憫臣衰病燭臣肺腑丐臣骸骨以盡
餘生則臣於未死之年即荷更生之賜也臣不勝惶恐
激切之至正德六年六月十二日奉聖旨卿忠誠體國
輔導累朝功烈譽望天下共知比來多事之際發謀出
慮周悉老成況神志精明述作議論尤為國華在任一
日有一日之益出處進退關係天下重輕近因屢疏辭
免朝廷已有旨再四勉留宜體朕諄切至情亟起視事

以慰衆望乃見君臣同德之義不必再辭吏部知道欽此

奏為老病陳情仰祈天鑒懇乞致仕事臣自揣衰病不能任事累歲乞休輒荷恩旨慰諭勉留諄複切至不一而足其大者一則曰先帝顧命輔導朕躬一則曰義雖君臣情猶父子一則曰卿之出處關係天下重輕捧誦之際至于感泣無所逃於天地之間竊伏自念陛下所以遇臣者如此其重所以責臣者如此其深若但玩愒歲

時虛糜廩祿以顧命自諉而無匡正之功以輔導為名
而乏謀猷之益則陛下亦將焉用之哉臣之官股肱耳
目之官也臣之責股肱耳目之責也手足痿痺則元氣
為之不仁視聽壅蔽則全體為之不具是臣之官失職
而責無由以塞也臣自請告以來病勢纏綿精力消耗
蹒跚於戶庭之內輾轉於牀褥之間深思遠憂無所不
至臣老而無嗣隻影自隨宗祀之責惟臣是任然此臣
一身一家之私者猶不足言也仰惟陛下春秋鼎盛福

履隆長紹統有年前星未耀乃祖宗億萬載社稷之寄
天下臣民億兆人履燾之情其所關係誠為重大昔在
孝宗皇帝親憑玉几渙發綸音早定大婚永圖至計
臣面承顧命夙夜于衷比之恒常情實倍萬責任之重
無過於臣臣所當言亦無有急於此者若復因循隱默
苟利目前臣恐衰病日深一旦溘先朝露生平無以副
陛下倚毗之望他日無以見先帝在天之靈誤國之罪
萬死莫贖用是不避威嚴敬披肝膽伏冀陛下上念承

傳之重俯懷翊戴之勤高拱穆清深居禁密朝奏以時
飲膳以節保聖躬於康樂延嗣續於蕃昌仍望憫臣衰
朽之質理難久長察臣忠懇之言止於如此容臣休致
以盡餘生則臣身雖退猶臣之進尚當伏跡山林仰瞻
魏闕頌聖主無疆之壽慶皇家不拔之圖臣無任傾心
瀝血俟罪祈恩之至正德六年七月二十一日奉聖旨
朕覽卿奏深用惕然具見元臣忠愛至情卿受遺先
朝輔導朕躬見今天下多事正宜同心佐理何忍舍朕

求去朕因卿言當上念承傳之重及臣民翊戴之勤卿亦宜強起視事副朕倚毗至願以仰答先帝顧命之意不必再辭吏部知道欽此

奏為陳情懇乞辭免恩廕事近該臣等累次辭免恩廕奉聖旨著吏兵二部會看續奉聖旨改廕六品文職臣等仰窺聖意俯悉下情謂非軍功難承世職曲加裁處俾受文階尚有愚誠冒干天聽臣等竊惟廕叙之典非特有文武之分抑亦有厚薄之等比因羣盜肆惡徧歷

諸方出入四五年間荼毒數千萬衆主憂臣辱安敢辭
勞天佑人歸僅成克捷即今姦克甫定凋瘵未蘓雖同
率土之歡豈免向隅之泣若燕齊河洛之安靖以為臣
等之功則川陝湖貴之縱橫復是誰與之過推恩蔭子
誠所未安且以六品之華階何可一朝而驟致用是懇
乞天恩並收成命使臣等安心於旦夕庶猶可圖報於
將來臣等感恩佩德有過於受蔭萬萬矣臣等不勝惶
恐激切之至正德七年十月初十日奉聖旨朕以卿等勞

勤特廢武品堅情不受今改文秩又動章聞可不必再
辭該衙門知道欽此

奏為陳情懇乞辭免恩廕事臣等再承恩廕累具辭章
曲荷綸音不蒙賜允若心無所愧豈敢固違但理有未
安終當懇訴竊惟事有常職故任事者無侵官恩有常
格故受恩者無愧色臣等所居之官論思輔導之職也
目不識兵馬之數耳不聞金鼓之音足不履行陣之地
身不冒矢石之險若文書之經由議論之關涉與戰伐

攻擊坐作進止者同功而例論推恩以及家是以前居
本分之勞冒格外非常之賞况臣等或已蒙廕錄不可
重沾或方歷歲年未經久試捫心揣分實不能堪所有
前項恩廕臣等終不敢受伏望聖明俯從愚請並收成
命以慰憂惶使臣等照常格守常職以圖報稱於萬一
臣等不勝感激之至正德七年十月二十四日奉聖旨
卿等累奏辭免特允所請該衙門知道欽此

奏為老病懇乞休致事竊念臣體質羸弱本自天生幼

小之時不敢自期壯長中年以後衰病相仍年日益增
病日加甚腰膝疼痛眼目眇昏家居入夜則步不能行
班行遇風則立不能定縱使朝參公座不過勉強支持
每當具奏乞休實是哀鳴懇訴未蒙鑒察曲荷涵容顧
今年連閏之月一十有三而在告之辰已過其半雖卑
官薄祿猶為曠職素餐况臣叨登一品之階兼給兩
官之俸非但難於報稱亦將累積愆尤况今歲暮裕
享不能陪列正旦朝賀不能隨班郊壇大祀不能看牲

分獻而深居飽飯偃仰在牀用是寤寐不寧食不下咽
再三籌度展轉思維臣之狼狽實不知所以自處也仰
惟陛下天地之量於人無所不容日月之明於物無所
不照伏望宥其既往而矜其所不能特降綸音許臣休
致則進退之際全晚節於始終俯仰之間託餘生於覆
載臣之感恩荷德與齒髮而無窮矣臣不勝懇迫激切
之至正德七年十二月二十九日奉聖旨卿累朝名德
學行才猷中外推重受先帝顧命輔導朕躬竭誠盡忠

功在社稷比年以來節次引疾乞休朕未能舍卿屢遣
官敦勸暫起視事茲乃固申前請情詞懇切朕閔勞以
政勉從所請寫勅諭意賞銀五十兩紵絲四表裏以表
眷懷著有司時常存問月給米八石歲撥人夫十名應
用仍廕子姪一人做中書舍人該部知道欽此

奏為謝恩事昨該臣具奏乞恩休致節該奉聖旨勉從
所請寫勅諭意賞銀五十兩紵絲四表裏以表眷懷
著有司時常存問月給米八石歲撥人夫十名應用

仍蔭子姪一人做中書舍人欽此竊念臣自弱冠以來
至於今日叨蒙累朝列聖作養拔擢之恩簡任顧託之
命天高地厚不可名言蓋嘗委質鞠躬少圖報稱而
才疎識淺莫效涓埃曠職素餐久而益甚况孱軀薄
質晚歲衰齡非敢忘死而後已之心亦嘗聞不能者止
之戒用是屢干聰聽懇請歸休每荷眷留輒增愧懼幸
回天鑒特賜允俞而又寵以璽書錫之金幣人夫食米
給在有司蔭子錄官俾延世賞恩深禮縟實倍常倫感

戴之餘曷勝欣忭伏願聖躬保重聖壽隆長德政日
新邦家鞏固臣幸得優游隴畝瞻望太平非惟飲德於
餘生抑且銜恩於身後永永而無窮也臣見今腰膝疼
痛行步艱難不能躬謝殿廷面辭黼扆不勝懷慚負咎
惶悚激切之至除望闕叩頭外謹具本謝恩正德七年
十二月三十日奉聖旨覽卿所奏足見老臣惓惓忠愛
餘意朕已具悉該衙門知道欽此

奏為謝恩事正德八年正月十三日該光祿寺差典簿

廳錄事李宗禮齋揭帖內開司禮監大監蕭敬傳奉聖
旨頒送慶成宴卓面一張鴛鴦餅一分酒五瓶臣竊念
優閒私第衰病餘生無扈從奔走之勞蒙眷注記存之
寵恩深禮特愛出前聞慚懼有加報酬無地與闔家而
共戴誓沒齒以難忘緣臣一向氣血虛弱腰膝疼痛
不能趨朝行禮除扶病望闕叩頭外謹具本謝恩正德
八年正月十四日

奏為謝恩事正德八年四月十五日欽蒙皇上遣內臣

頒賜勅諭一道新鈔三千貫銀五十兩紵絲四表裏衣服一套到臣私第絲綸渙汗非徒一字之褒金幣輝煌遠過百朋之錫是蓋施恩於不報之地惟當感德於未死之年愧懼交并名言莫既緣臣自致仕以來一向腰膝疼痛行步艱難不能趨朝行禮除扶病望闕叩頭外理合具本謝恩正德八年四月十六日

懷麓堂集卷一百

懷麓堂文集後序

此少師西涯先生李文正公之集也詩賦共若干首銘誌雜文若干首奉勅碑記若干首奏疏若干首總若干卷而續集不與焉嗚呼富矣予嘗聞有一代之興必有一代英賢之佐進而左右厥辟考脩班制敷為述作以昭覲文華國之美然其成也有漸其發也有機必治極百年天鑒昭格篤生賢輔始克際登茲盛如周至宣王數更九世作材復古紹休先王于是尹吉甫仍叔申伯

仲山甫方叔召虎咸能先後禦侮升政大猷而仍叔吉甫之徒又能鋪張贊詠以道其事如車攻崧高蒸民江漢朝奕諸作是已夫周之治固郁郁其文然微諸賢則所謂至今望其君臣若神人然者又惡能若是其烈哉我皇祖受命開極肇隆文化列聖相繼引養引恬至於成化弘治間人文之盛於斯為極公適出會其期攄其所蘊見於詞章高文大冊既已光朝著而澤海宇而長篇短述又皆流播四方膾炙人口蓋操文柄四十餘年

出其門者號有家法雖在疎逖亦竊效其詞規字體以
競風韻之末而名一時豈偶然哉夷考公平生小心慎
密不事矯褻歷官禁近節儉正直雅有羔羊之風方今
上嗣德訪落之初及元凶鞠人忭忒之際公以耆望屹
然在服中間扶持善類將順德意陰利天下蓋有人不
及知者罪人斯得益啟淵衷進賢屏惡溥惠滌瑕以植
民生而綿國脉傳謂為人臣者怠則張而相之廢則掃
而更之謂之社稷之役公實有焉及其憂則違之責于

丘園賓從遊歌若忘素顯而聞朝廷用一善人興一善治必喜動顏色如自己出或議及古今政疵民瘥亦復恫瘝乃身故予嘗為文壽公謂其居廟堂未嘗不以山林為念在山林未嘗不以廟堂為憂其心始終不廢民胞物與之情乃心王室之義正謂此也公既捐館國論益明朝貶節惠謚曰文正孔子曰言有物而行有恒也是以生則不可奪志死則不可奪名公固今日之山甫仍叔也向非文與功偕德與位侔亦烏能獲是名于天

下後世哉公之所謂文者蓋如此然非予一人之私言也集刻于徽州郡齋前守熊君桂請予序其後今守張君芹又繼請不已且公未屬績時亦嘗面有是命予雖不敏其何敢忘敬為論著公經國之業與公平生志節之大如右俾讀是集者有所考焉正德戊寅十二月朔旦門生京江靳貴謹序



總校官庶吉士臣張能照
校對官助教臣金學詩

騰錄監生臣趙興吾

財團
去人
佛陀教育基金會
釋淨空
敬贈

